

## ON S’A RTROVÉ, ON S’ VA RILÈYÎ...

L’ soper fini on a sti s’ achîr au bwârd di Moûse èt ratinde li momint d’ èraler. Pate à pate, li lune s’a moustré èt monter prinde si place, lès waches si sont rapaujîyes; au mitan d’on sospîr Nicole m’a dit k’ il èstéve d’ tins d’ î aler. Dji lî a tinu s’ mwin po l’ aidî à griper dsus l’ batia; mêtû à place à costé d’ lèye dji lî sèrève co l’ coron dès dwèts. On s’ a riwêti d’ crèsse èt dimèrer moyas. Bêrcî pa lès tènes brûts dès wachotes dji m’ a mêtû à rêver. Lès tchîpèlmints dès mouchons dins lès âbes dsus lès tiènes mi rimimbrîne lès ayèssaedjes do tins passé mins, pus råde ki di m’ fê plêji, ça m’a rindu tot anoyeu. Pigote à migote, dji divnéve co pus neurasténike. Maugré l’ tot câlme cî sins nûlêye, l’ frêcheu d’ l’ airaedje, l’ douce lumêre dèl lune, lès riglatichants frumîjmints d’ ardjint d’ l’ aiwe èt l’ bèle comère adlé mi, dji n’ èstéve nèn à m’ n’ auje po profiter do momint. È m’ keûr s’ avîne sititchî dès tuzaedjes ki m’ fyîne mau. V’la k’ ça m’ rivnéve : kan on s’ a mêtû à s’ frékenter on s’ avéve dédjâ insi pormwinrné. Tos lès plêjant sintimints k’ adon rimplijîne mi âme si sont à rlaye ramoncêlés èt m’ rinde co pîre anoyeu. Tot c’ki s’ avéve passé au tins d’ nosse djonnesse, li scole, nos chîjes à bèrdèler, lès ptits mos djintis, sicrîts au mitan d’ branmints d’ crwès, dsus dès bokèts d’ papî, nos raploûs au rcwès dès racuzètes, lès bètchs sicrotés dins lès bouchnisses, lès râres plêjis pris à l’ va-vite dins lès strins, cès banslêyes di ptits cayèts ki batichenut l’ imaudje do bouneûr k’ a passé oute; tot rigripéve, scayon pa scayon, lès montêyes dès sovnancesses passêyes oute èt m’ rinde co pus strindu èt misèrabe.

“C’èst fini, k’dji m’ dijéve à mi-minme, tot l’ bon tins èst bèn fini, il èst pou todi bèn foû. C’èst maleûreû mins i n’ rivinront pus; èt nos vola kan minme à continuer viker, à ièsse èchène èt nos keûrs sont co bèn aloyîs.”

I m’ chèneve ki dj’ aréve polu pus aujîyemint supwârté k’ èle fuche mwâte obén pièrdeuwe au lon; dj’ avéve stî branmint mia à m’ n’ auje tot lès ans passés lon èri d’ lèye. Adon, kan dji somadjéve, l’ èspwêr dèl rivoye soladjéve mi pauve keûr èt dj’ èstéve sûr k’ on ptit momint avou lèye mi rafiyeréve èt richoûrbu totes mès pwinnes; mins, ièsse tot à costé d’ lèye, li voye,


li sinte, lî polu djôzer, l’ bètchî, l’ rabrèssî, l’ inmer, l’ adorer èt, l’ euchant co à m’ mwin, s’ goût todi dsus m’ linwe, sawè ki dj’ aléve l’ ripiède po todi : vola c’ ki m’ èradjéve èt m’ rinde fén mwê djuska rinauder di dèsèspwêr.

Bèn rade dès nwârts prodjèts s’ sont mêtus à cobèroler è m’ tièsse, minme ki dj’ a stî tot prèsse di nos taper dins lès waches, tot l’ rabrèssant on dêrin còp, èt d’fini insi m’ vikêrîye èt tot mès fèls disbaudchaedjes. Ça m’a stî si lon ki dj’a stî oblidi d’ lèyî tchère si mwin èt d’ è nnd’aler tot seû djusk’a l’ bètchète do batia. Vêla, tot c’ki m’ trèvautchéve èl tièsse s’ a mêtû à kandjî èt è m’ n’ âme on pus doû sintimint s’ a spaurdu. Dès laurmes m’ont monté aus ouy. Tot ratinri, dji sintéve li dèsèspwêr mi kiter. Tot bièsse, dj’a pri do plêji avou cès noûs sintumints èt dimèrer à braîre fwârt èt lontins. Ça m’a soladjî d’ plorer.

Kan dji m’a sintu mia, dji seû r’touiné adlé Nicole èt lî rprinde si mwin. Èle î frochîve si blanc

mokwè. Il  
èstéve tot  
ramouyî.  
“Oufi, lî a-dj’  
di tot bas, dji  
vwè k’nos  
keûrs ni s’sont  
mauy djoké d’  
toker èchène d’  
on minme lan !  
– C’èst l’ vray,  
m’ at-èle  
rèsondu tot  
ikotant, mins i  
fauréve kça  
fuche bèn po l’  
dêrin còp k’is  
uchinche djôzé  
avou c’ brût là.”  
(...)

(Si vos avoz  
rconchu la ddins  
ène miète dèl  
“Noûve Èloyîse”  
da Djan-Djake  
Rossia, v’s-èstoz  
dins lès pus fwârts  
à z’awè bèn dès  
lètes èt ène bèn  
boune  
mémwêre...)



**On saye di continuer à tot comachî...**